

Don Bosco e s. Cassian novs partenaris

Sco quai che l'uniun Parc Ela ha communitgà il mardi, daventan il campadi s. Cassian e la chasa da vacanzas Don Bosco a Lantsch «firmas da partenari» dal Parc Ela. Firms che «vivan las valurs dal parc da natira e retiran lur products da la regiun», sco quai che il Parc Ela scriva, pon sa numnar ambassaduras dal Parc natiral. «Nus essan loschs, da pudair beneventar il campadi s. Cassian e la chasa da vacanzas Don Bosco sco partenaris», vegn citada la manadra da products regiunals dal Parc Ela, Heidrun Moschitz en la comunicaziun.

Tut en tut ha il Parc Ela actualmain 24 firmas da partenari, sajan quai hotels, gastronomia, artisanadi ed agricultura. (cdm/fmr)





La chasa da vacanzas Don Bosco è da nov ina firma da partenari dal Parc Ela.



Tar il campadi s. Cassian a Lantsch tutga era in'ustaria.

Fotos MAD

Val d'Alvra – in hotspot da baus



En il rom dal project han ins era chattà spezias periclitadas sco il «Gefleckter Pappelbock» (Saperda perforata, a dretga) u il «Goldpunkt-Nadelholz-Prachtkäfer» (Chrysobothris solieri).

Fotos Alexander Szallies

Toni Vinzens/FMR

Durant radund 3 onns è la fauna da baus da laina en la Val d'Alvra vegnida perscrutada per incumbensa dal Parc Ela. Sco che quel ha communitgà ils 3 da favrer 2025, è il project che ha cumenzà la stad 2022 oramai terminà: 737 spezias da baus èn vegnidas documentadas, e quai cun inqual scuverta preziusa.

«Resultats remartgabels» – sco ch'il Parc Ela ha communitgà ils 3 da favrer 2025, èn vegnidas documentadas intginas spezias preziusas en il rom d'in project da perscrutaziun da la fauna da baus en la Val d'Alvra. Tranter las 737 spezias da baus hajan ins numnadamain chattà trais novas per la Svizra, set baus da lain periclitads ed indesch uschenumnadas «Urwaldrelikt-Arten», pia spezias che dependan da plantas veglias e laina morta, ubain gaud natiral.

Spezias preziusas cun nums misterius

Monochamus saluarius, Chrysobothris solieri u Saperda perforata – betg be ils nums scientifics, er ils nums tudestgs èn plitost misterius per persunas che n'èn insumma betg dal fatg: «Waldgebirgs-Langhornbock», «Gefleckter Pappelbock» e respectivamain «Goldpunkt-Nadelholz-Prachtkäfer».

Intgins dals baus documentads en il rom dal project èn dentant zunt prezius e mussan ch'ils gauds en la Val d'Alvra èn ritgs da spezias. Quai vala per exempel per il «Waldgebirgs-Langhornbock» ch'è sper l'«Ahorn-splintkäfer» ed in bau ad alas curtas cun il

num «Bisnius palmi» ina da las trais spezias documentadas per l'emprima giada en Svizra.

Gaud da trembels cunzunt ritg

La perscrutaziun da la fauna dals baus en la Val d'Alvra n'ha dentant betg be purtà a la glisch ina ritgezza da las spezias, mabain er mussà, tge gaud che dat alloschi a particularmain bieras spezias da baus. En il rom dal project èn numnadamain vegnids examinads differents tips da gauds: da gauds d'ogna e trembels en la val fin gauds da sember e pigns al cunfin aut. Tenor la comunicaziun sajan pia cunzunt ils gauds da feglia ritgs da spezias, sco per exempel il gaud da trembels Solas Davains.

Damai accentuescha l'inschignera forestala e co-manadra dal project Barbara Huber l'impurtanza da gauds da feglia, sco ch'ins po leger en la comunicaziun: «Ils resultats mussan, quant impurtant che pitschens gauds da feglia èn en ina cuntrada dominada da gauds da conifera. Il spectrum da spezias da baus da laina sa distingua considerablamain tut tenor gaud. Bieras larvas sa svilupeschan be en in dal dus tips, gaud da feglia u gaud da conifera.»

Per tgi che vul savair dapli: La primavera 2025 è planisà ad Alvagni in referat da Barbara Huber davart ils resultats dal project. La data vegn anc publicada dal Parc Ela.